

浙川直隸廳鄉土志

卷二

1537

兵事錄

浙川負山阻水便於攻守是故鄧曼  
漢之業孟珙因之以振南宋之緒豈非以其地利  
使然乎惟是密邇鄖均易滋伏莽且其地當秦楚  
孔道北接武關為全陝門戶故歷代兵事恒當其  
衝至明季而極矣



國家文事武備超軼前代咸同之際楚匪迭至而  
卒無虞者非惟天幸亦其所以備之者有素也今  
志兵事上究列代下迄近今攷其成敗利鈍亦古  
今得失之林也

全在本境之兵事

周襄王十有七年魯僖公二十有五年秦晋伐郤楚鬥克屈

禦寇以申息之師戍商密秦人過析隈入而係輿  
人以圍商密昏而傳焉宵坎血加書偽與子儀子  
邊盟者商密人懼曰秦取析矣戍人反矣乃降楚  
師楚囚申公子儀息公子邊以還左傳

周襄王二十有九年

魯文公四年

秦人入郟

春秋

景王二十有一年

魯昭公十年有八年

楚令尹王子勝言於

楚子曰許子鄭仇敵也而居楚地以不禮於鄭晉

鄭方睦鄭若伐許而晉助之楚喪地矣君盍遷許

許不專於楚鄭方有令政許曰余舊國也鄭曰余

俘邑也葉在楚國方城外之蔽也土不可易國不

可小許不可俘仇不可啟君其圖之楚子說冬楚

子使王子勝遷許於析實白羽

左傳

赧王十七年秦留楚懷王要以割地楚人立頃襄

王告於秦曰賴社稷神靈國有王矣秦昭襄王怒

發兵出武關攻楚大敗楚軍斬首五萬取析十五

城而去

史記

晉康帝建元二年夏征西將軍都督征討諸軍事

庾翼使梁州刺史桓宣擊趙將李羆於丹水為羆

所敗

晉書

穆帝永和八年秦王苻健僭帝號於長安別帥侵

順陽太守薛珍擊敗之晉書

孝武帝太原二年三月秦兵寇南鄉拔之山蠻三

萬戶降秦晉書

四年二月秦將軍慕容越拔順陽執太守丁穆至

長安秦王堅欲官之穆固辭不受晉書

宋武帝時丹析二州蠻屢起為寇雍州刺史張邵

誘其帥因大會誅之悉掩其餘黨宋書

唐高祖武德元年初城父朱粲為縣佐史從軍遂

亡命聚眾為盜謂之可達寒賊自稱迦樓羅王眾

至十餘萬引兵轉掠荆沔及山南郡縣所過噍類

無遺是年十月自稱楚帝於冠軍改元昌達進攻

鄧州鄧州刺史呂子臧及山南撫慰使馬元規死

之朱粲遂寇浙川遣太常卿鄭元璠帥步騎一萬

擊之十二月鄭元璠擊朱粲於商州破之新唐書

宋仁宗天聖間大賊張海郭倪山攻劫商鄧破南

陽順陽時知浙川事孫甫安輯有方嘗曰教民知

戰古法也乃親閱弓矢教之擊射坐作皆有法盜  
賊為息宋史

涉及本境之兵事

周敬王二十有九年

魯哀公四年

楚大夫單浮餘圍蠻

氏蠻氏潰蠻子赤奔晉陰地司馬起豐析與狄戎  
以臨上雒晉人誘執戎蠻子赤與其五大夫歸於

楚昇楚師於三戶

左傳

秦二世三年七月沛公畧南陽郡南陽守齮降封

為殷侯引兵西無不下者至丹水高武侯鯁襄侯

王陵降還攻胡陽遇番君別將梅銷與偕攻析酈

皆降因襲攻武關破之

漢書

漢更始元年遣大將軍申屠建丞相司直李松等

攻武關討王莽析人鄧昱于匡起兵南鄉百餘人

應應之時析宰將兵數千屯劇亭備武關請降昱匡

盡得其眾昱自稱輔漢左將軍匡右將軍拔析丹

水攻武關都尉朱萌降

漢書

東漢光武帝建武元年正月更始復漢將軍鄧昱  
輔漢將軍于匡降皆復爵位時赤眉延岑暴亂三  
輔郡縣大姓名各擁兵衆二年乃遣征西大將軍陽  
夏候馮異代大司馬梁侯鄧愈討之異且戰且行  
屯軍上林苑中南鄭人延岑起兵據漢中既破赤  
眉自稱武安王拜置牧守欲據關中三年夏岑引  
張邯任良共攻異異擊破之諸營保附岑者皆來  
降歸異岑走攻析異遣復漢將軍鄧昱輔漢將軍

于匡要擊岑大破之降其將蘇臣等八千餘人岑

遂自武關走南陽

後漢書

四年二月先是漢中賊延岑攻南陽得數城為建  
威大將軍耿弇敗於穰又為建義大將軍朱祐等  
敗於東陽遂與黎丘賊偽楚黎王秦豐合走歸秦  
豐至是復寇順陽間遣右將軍梁侯鄧禹護復漢  
將鄧昱輔漢將軍于匡擊破岑于鄧追至武當復  
破之岑奔漢中餘黨盡降

後漢書

六年夏前將軍固始侯李通領破姦將軍侯進捕  
鹵將軍王霸等十營擊漢中賊延岑岑時以降于  
公孫述述以為大司馬封汝寧王遣兵赴援通等  
與戰於西域破之還屯田順陽

後漢書

獻帝初平元年奮武將軍曹操討董卓引兵遇卓  
將與戰兵敗遂還酸棗時後將軍山陽太守袁術  
屯南陽操謀使率南陽之軍軍丹水入武關以震  
三輔術等不能用

後漢書

晉愍帝建興三年荊州刺史陶侃既克杜弢乘勝  
進擊杜曾曾多騎兵密開門突侃陣出其後反擊  
之侃兵死者數百人曾將趨順陽下馬拜侃告辭  
而去時荀崧都督荊州江北諸軍事屯宛曾復致  
牋於崧求討丹水賊以自效崧許之

晉書

康帝建元二年秋七月丁巳下詔議經畧中原安  
西將軍假都督江荆司雍梁益六州諸軍事荊州  
刺史庾翼代庾亮鎮武昌欲悉所部之衆北伐表

桓宣為都督司雍梁三州荊州之四郡諸軍事梁  
州刺史宣前趨丹水

晉書

穆帝永和十年二月安西將軍持節都督荆司雍  
益梁寧六州諸軍事領護南蠻校尉荊州刺史桓  
溫統步騎四萬發江陵水軍自襄陽入均口至南  
鄉步兵四萬自析川以征關中命梁州刺史司馬  
勳出子午道以伐秦遣別將入析川攻上洛執苻  
健新置刺史郭敬

晉書

孝武帝太元三年二月秦王苻堅遣京兆尹慕容  
垂楊武將軍姚萇帥衆五萬出南鄉會攻襄陽

晉書

太初末順陽太守彭泉以郡降於後秦王姚興興  
遣楊佛嵩率騎五千與其荊州刺史趙曜迎之遂  
寇陷南鄉擒建武將軍劉嵩畧地至梁國而歸

晉書

安帝義熙元年七月侍中車騎將軍都督荆司等  
十六州諸軍事徐青兗三州刺史劉裕遣使求和  
於後秦因求南鄉諸郡後秦王姚興許之遂割南



鄉順陽新野舞陰等十二州歸於晉

晉書

齊明帝永泰元年魏統軍李佐攻拔新野縛太守  
劉思忌不屈死之南鄉太守席謙湖陽戍主蔡道  
福赭陽戍主成公期舞陽戍主黃瑤起相繼南遁  
南陽新野南鄉北襄城西汝南北義陽諸郡俱陷  
沒齊書

東昏侯永元二年命太尉陳顯達督平北將軍崔  
慧景軍四萬擊魏欲復雍州諸郡顯達與魏前將

軍元英戰屢破之攻馬圈城四十日城中食盡噉  
死人肉及樹皮魏人突走斬獲千計顯達入城將  
士競取絹遂不窮追顯達又遣軍主莊邱黑進擊  
南鄉拔之崔慧景攻魏順陽順陽太守張烈固守  
魏主至馬圈陳顯達敗績崔慧景退

齊書

梁武帝普通六年正月雍州刺史普安王綱遣安  
北長史柳渾破魏南鄉郡司馬董當門破魏晉城  
又破馬圈彫陽二城魏方有事於西北二荆西郢

羣蠻皆反斷三鴟路殺都督寇掠北至襄城時羣蠻引梁將曹義宗等圍魏荊州曹義宗等取順陽馬圈魏遣征虜將軍裴衍等率軍一萬出武關以救荊逆戰於淅陽義宗等敗退衍等復取順陽進圍馬圈濟州刺史董紹以馬圈城堅衍糧少上書

言其必敗未幾義宗擊衍等破之復取順陽

梁書按曹

義宗魏書作敬宗

西魏孝武帝永熙三年魏主西奔荊州刺史賀拔

勝使長史元欵行荊州事守南陽自帥所部西赴

關中至淅陽

魏書

東魏孝靜帝天平元年東魏既取荊州魏以獨孤信為都督三荊州諸軍事尚書右僕射東南道行臺大都督荊州刺史以招懷之蠻首樊五能攻破淅陽郡以應魏東魏西荊州刺史辛纂欲討之行臺郎中李廣諫曰淅陽四面無民惟一城之地山路深險表裏羣蠻今少遣兵則不能制賊多遣則

根本虛弱脫不如意大挫威名人情一去州城難  
保纂曰豈可縱賊不討廣曰今所憂在心腹何暇  
治疥癬聞臺軍不久應至公但約勒屬城使完壘  
撫民以討之雖失淅陽不足惜也纂不從遣兵攻  
之兵敗諸將因亡不返城民密召獨孤信信至武  
陶東魏遣恆農太守田八能拒信於淅陽又遣都  
督張齊民以步騎三千出信之後信謂其眾曰今  
士卒不滿千人首尾受敵若還擊齊民則士民必

謂我退走必爭來邀我不如進擊八能破之齊民  
自潰矣遂擊破八能乘勝襲穰卒纂勒兵出戰大  
敗還趨城門未及閤信令都督楊忠為前驅叱門  
者皆散帥眾入城斬纂以徇城中懾服信分兵定  
三荆居半載東魏高敖曹侯景將兵奄至城下信  
兵少不敵與楊忠皆奔梁

魏書

宋理宗紹定四年蒙古太宗命太弟拖雷代金入  
饒風關十二月渡漢江金哀宗遣平章政事完顏

合達忠孝軍提控完顏陳和尚叅政移刺蒲阿將  
步騎十五萬出屯順陽以禦之明年戰於均州之  
三峯山金師大敗合達等皆死之是時宋以孟珙  
為京西馬兵鈐轄屯棗陽軍仍總忠順二軍初珙  
父宗政本棗陽土豪有胆畧多戰功寧宗時為京  
西鈐轄權知棗陽軍會金帥完顏訛可擁步騎傳  
城頹兵八十餘日趙方知其氣已竭乃召扈再興  
許國自唐鄧還併東師隸於再興尅期合戰再興

敗金人於灤河又敗之城南宗政自城中出擊內  
外合勢士氣大振賈勇入金營自晡至三更殺其  
衆三萬金人大潰訛可單騎遁宗政追金人至馬  
蹬寨焚其城入鄧州而還金人自是不敢窺襄漢

宋史  
通鑑

六年蒙古將那顏奔盞追金主逼蔡州理宗詔京  
西兵馬鈐轄孟珙戍鄂共伐金四月金唐鄧行省  
恒山公武仙次於順陽與唐州守將武天錫鄧州

守將移刺瑗相犄角謀迎金主入蜀遂犯光化軍其鋒甚銳珙自襄陽帥師迎戰逼武天錫壘一鼓拔之壯士張子良斬天錫首俘將士四百餘人敗金人於呂堰俘獲不可勝計遂攻順陽仙大敗退屯馬蹬山順陽縣令李英申州安撫張琳皆以城降鄧州守將移刺瑗孤立而懼遣使請降珙納之為易衣冠皆以賓禮見之於是降者相繼仙勢益蹙珙言於刑部侍郎兼京湖安撫制置使史嵩之

曰歸附之人宜因其鄉土而使之耕因其民人而立之長少壯籍為軍俾自耕自守才能者分以土地任以職事使各招其徒以殺其勢嵩之從之秋七月己酉仙愛將劉儀見仙窮迫領壯士二百詣珙降珙問仙虛實儀曰仙所據九砦其大砦石穴山以馬蹬沙窩岵山三砦蔽其前三砦不破石穴未易圖也又以麗金默侯里板橋王子山鮎魚崖五砦翼其旁砦甚險阻未易攻若先破麗金砦則王

子山砦亦破岵山沙窩孤立三師成擒矣珙翌日遣廬秀執黑旗帥衆入麗金砦金人不疑宋軍乃分據巷道大呼縱火掩殺殆盡是夜復令壯士楊清王建等亦搗王子山砦建入帳中斬金小元帥首而出丙辰遂出師圍馬蹬山遣樊文彬等攻其前門成明等邀截西路一軍圍紇不烈一軍圍小總帥砦火光燭天殺戮山積逸去者復為成明伏軍所得壯士老少萬二千三百來歸師還至沙窩西與金人遇大捷是日三戰三克未幾丁順等又破默里侯砦珙召議曰此砦既破石穴板橋必大震汝能為我招之乎儀請選婦人三百偽逃歸懷招安榜以往仍計遣晉德見花腿王顯金鎮撫安威招降之珙料仙勢窮蹙必上岵山絕頂窺伺乃先令樊文彬詰旦奪岵山駐軍其下前當設伏後遮歸路已而仙衆果登山及半文彬麾旗伏兵四起仙衆失措枕籍崖谷山為之赭殺其將兀沙慝

擒七百三十人棄鎧甲如山薄暮珙進軍至小水  
河儀又言仙不欲降謀往商州依險以守然老稚  
不願其去珙曰進兵不可緩夜漏下十刻召文彬  
等受方畧約以明日侵晨攻石穴砦中夜蓐食啟  
行晨至石穴時積雨未霽文彬患之珙曰此雪夜  
擒吳元濟之時也策馬直至石穴分兵進攻自寅  
至己力戰九砦一時俱破武仙走追及於鮎魚崖  
仙望見易服而遁復戰於銀葫蘆山又敗之仙遂

與五六騎奔追之隱不見降其衆七萬人獲甲兵  
無算由是順陽及唐鄧等州復歸於宋珙還軍襄

陽

宋史

明莊烈帝崇禎六年賊將闖塌天入河南遂由內

鄉浙川犯湖廣破數縣

明史

七年以陳奇瑜總督河南山陝川湖軍務討流賊  
先是老回回過天星滿天星闖塌天混世王五大  
營自楚入蜀陷夔州阻險復走還楚分為三一犯

均州往河南一犯鄖陽往浙川一犯金漆坪渡河  
犯商南竒瑜乃馳至均州檄四巡撫會討十餘戰  
皆捷斬賊數千級

明史

八年四月督師洪承疇以吳村瓦屋乃內鄉浙川  
要地令左良玉與楊九州以五千兵扼之

明史

九年六月己亥總兵官解進忠撫賊於浙川被殺

明史

九年七月盧象昇渡浙河而南九月追賊至鄖西

明史

九年九月流賊犯內鄉順陽川屯駐九日一方竟

無人烟十月二日張獻忠陷鄧州四閱月陷浙川

縣攻內鄉不克城外之民盡被殺掠

圖書集成按明史左良

玉傳十年正月安慶告警詔良玉從中州救之道

勦殺南陽土寇楊四侯馭民郭三海遂破六安應

天巡撫張國維三檄良玉入山搜勦不應河南監

軍太監力促之始北去賊已飽掠入山矣已浙川

陷良玉擁兵不救以六安破賊功落職戴

罪則此次浙川之陷當在十年二三月

十一年賊移瞰商雒熊文燦約孫傅廷夾擊屬吏



王文清等三戰三敗之賊奔內鄉浙川而去

明史

十一年十二月河南巡撫常道立調左良玉於陝

州賊乘盧氏虛遁入內浙

明史

十二年五月張獻忠羅汝才復叛仍命劉元斌盧九德監孫應元黃得功軍南征應元等馳至南陽會馬光玉屯浙川之吳村偽乞撫規渡漢江應獻忠浙川知縣郭守邦說降其黨許可變胡可受可變即賊改世王可受則安世王也可變夜至處之

東關可受為光玉所特約未定應元得功趨內鄉掩其背令副將周遇吉分道別擊之文燦所遣陳洪範亦至八月至小黃河口參將馬文豸等力戰可受敗呼曰始與許王約降者我也今歸命遇吉駐馬受之應元得功遂進兵王家砦賊分屯南北兩山用木石塞道應元率文豸戰其南得功率副將林報國戰其北河南兵又扼華陽關賊遂大敗光玉遁免元斌至軍檄除可變可受罪授以官

明史

按周遇吉傳黃得功傳皆載此事周遇吉傳與此相符黃得功傳則差及一年究不知是一次事否姑並增之以備參考周遇吉傳云十二年秋復出討賊破胡可受於浙川降其全部黃得功傳云十一年以禁軍從總督熊文燦擊賊於舞陽慶光固間最八月又從擊賊馬光玉於浙川之吳村王家砦大破之

十四年七月李自成走內鄉浙川將入湖廣羅汝才復南陽趨鄧浙與合兵左良玉自南陽府追勦至內鄉遣將截殺及於浙川七月初三日與自成大戰於浙川城外良玉兵敗績總督楊文岳趨鄧

州自成還攻之文岳戰三捷斬其魁一條龍一隻龍賊遁去時泌陽訓導胡崇易註防花園關民若轉輸自此內鄉遂為秦楚孔道援勦往來者無虛歲而流賊亦愈衆矣

明史圖書集成

十四年九月李自成破杞縣拔泌陽十一月乘勝陷南陽下鄧州遂攻浙川屠其城初高迎祥既誅衆推自成為闖王總督陳奇瑜圍漢中自成窘自縛乞降奇瑜許之給免死票回籍遂過雲棧出

險入鳳翔掠隴川勢復振總督洪承疇總兵左光先連敗之其衆漸散會寧夏兵變洪師旋邊鎮自成復出潼關至河南分道入四川承疇檄川中諸道兵力攻大破之自成遂入楚依張獻忠不納將殺之自成獨乘驢日行六百餘里走商雒至浙川老回回營卧病半月老回回授以數百人仍出剽掠而秦兵又破之遂竄漢南窮蹙不得他逸食且盡欲自經者數養子李雙喜救之止以五千騎間

道奔河南河南饑斗穀萬錢人心惶動饑民多歸坵舉人李岩牛金星亦往投薦卜者宋獻策進圖讖云十八子主神器自成大悅遂率衆自南陽破宜陽攻永寧殺萬安王入洛陽殺福王至是連陷南陽汝鄧十餘城由是席捲河南荆襄鄢郢一時俱陷賊遂不可制矣

明史廿一史約編

十五年六月李自成據襄陽以河洛荆襄四戰之地關中其故鄉士馬甲天下據之可以霸決策西

向憚潼關天險將自浙川龍駒峇間道入陝西孫  
傳庭聞之令馮師孔率四川甘肅兵駐商雒為犄  
角而師孔趨戰無何我師敗績於南陽賊遂乘勝  
破潼關大隊長驅勢如破竹

明史

十六年李自成據有河南湖北十餘郡自號新順  
王設官置戍營襄陽而居之將由內浙窺商雒盡  
發荆襄兵會於汜水滎澤伐竹結筏人佩三葫蘆  
將謀渡河孫傳庭分兵防禦檄諸軍進勦九月八

日訊降賊知賊虛實遂破寶豐擣唐縣轉戰至邠  
縣幾獲自成賊奔襄城

明史

十七年五月我

朝定鼎燕京議出師勦賊戶部侍郎王永鰲言重兵  
萃京畿需鑲不億請擇畿南及山東河南要地分  
兵控鎮俟秋高進勦闖賊就近調度可北扼潼關  
南扼武關從之九月命英親王豫親王同吳三桂  
孔有德等分道出師明年正月我師渡孟津至潼關

自成亦出關逆戰諸軍夾攻大破之賊遂棄關遁  
回西安焚宮室由龍駒砦出武關走湖廣正月至  
浙川復入城焚掠殆盡我兵兩道追攝連蹙之鄧  
州承天德安武昌窮追至賊老營大破之者八是  
年九月自成伏誅於通城九宮山明年其餘孽王  
二等據竹溪旋至浙大掠而去

明史聖武記縣志

嘉慶二年教匪李全由信陽轉應山隨州向確山  
趨浙川奔盧氏慶成勦之賊益西由內鄉盧氏諸  
山進逼武關商雒所至驅脅復有商南新起賊五  
六千應姚之富齊王氏皆追及於鄖西連兵西上  
遂由陝入川

聖武記

五年十二月川賊相繼復窺漢而冉天士樊人傑  
衆二三千復奔石泉江岸慶成截其半濟其先渡  
河之千騎由五郎華陽東奔額勒登保即率楊遇  
春回濟漢北邀其赴商雒之路慶成亦伏兵石泉  
江岸擊破高馬等賊時冉學勝伍懷志殘賊各僅

二三百適樊冉二賊至復合隊裏脅數千楊遇春  
穆克登布突擊于洵陽灞禽斬六百餘賊奔江口  
留樊賊綴官兵而冉學勝步騎二千先趨高雒間  
道楊遇春等敗步賊於龍駒砦復邀其騎賊於武  
關荆紫關與綸布春江啟軍三路截擊賊始不敢

東竄

聖武記

咸豐七年二月襄陽土匪由均州房縣竄入豫省  
浙川內鄉諸境內鄉知縣楊鏞率團抵禦賊伺隙闖  
入縣城南陽知府何懷珍及紳士高振完高振洛  
各率勇團馳往會合楊鏞勦斃匪衆收復縣城時  
南陽鎮總兵邱聯恩方陳師楚豫境上合楚擊勦  
兼固豫固得報急回軍勦捕時所部不滿二千十  
四日至李官橋猝與賊遇擊斬數十人追二里許  
忽左右伏賊四起圍之數重兵士相顧失色邱聯  
恩連射賊皆應絃倒因引滿注矢擬賊騎固敢近  
者既出圍步隊為賊困復躍馬大呼入圍拔出之

凡數入入輒手及十數人近之者皆辟易或瞠目  
立如偶不能仰視是役也邱聯恩壹矢皆竭血水  
刀環間纒寸許比至半扎店籍傷亡兵勇數流涕  
自責親為裹創傅藥衆皆感奮期翌日復戰於文  
曲集賊聞大懼乃夜遁復回襄陽

豫軍紀畧

十月十三日角子山土匪由武關竄擾商南縣為  
守城兵開礮擊退始遁走富水關一路回竄浙川  
廳境之西坪人數稍衆僧營總管德楞額等率軍

追躡十七日抵丁河店偵知賊自北山溝竄踞北  
峪山十八日我軍鈔進山溝先令馬隊於溝外斷  
賊鈔路德楞額等親率步隊躡越亂石嶺奮勇進  
擊匪衆迎拒兩山飛石如雨我兵開礮斃賊七十  
餘匪由山後鈔襲我軍為馬隊截殺始敗退我軍  
馬步併力衝殺復斃賊數十匪向山僻竄遁山深  
路險官兵馬隊不能馳騁且我軍自九月初入山  
追勦每日馳逐層巒間不少休息人馬疲乏溲漆

派生力軍助勦於是巡撫英桂飛檄邱聯恩一軍  
迅赴浙川內鄉會合德楞額相機勦擊未至而匪  
已遠颺矣

豫軍紀畧

十一年九月十一日晚匪姜太林掠新野趨樊城  
復由鄧州入內鄉浙川荆子關副將伊里綱阿等  
號召丹河兩岸鄉團以禦賊二十六日賊萬餘竄  
至清風嶺山口徑曲路窄賊騎不得騁鄉團敗之  
殲馬步賊四百餘追至浙河擊賊半渡斬黃衣賊

目賊敗奔由內鄉鎮平竄南召

豫軍紀畧

同治元年二月粵匪由南陽趨鎮平內鄉入西峽  
口始縱殺掠折由西坪襲富水關入陝西商雒進  
擾尹家衛

豫軍紀畧

五月偽扶王陳德才分股竄鄖西擾及浙川之戴  
家河距荆子關數十里初陳德才自渭南竄出欲  
至安徽援英逆陳玉成經西安將軍托明阿等沿  
途截勦破之遂竄河南聞陳玉成已伏誅因在浙



川內鄉一帶掠地攻城而陳玉成所部之衆自玉成伏誅後窮無所歸六月竄擾南陽府為楚軍擊退復由浙川廳馬蹬雙河鎮厚坡李官橋一帶竄擾河南兵力單薄無制勝之師致被沿途裹脅並糾合捻匪復有衆四五萬七月竄湖北光化縣之

老河口

豫軍紀畧平定粵匪紀畧

八月粵匪攻浙川廳署同知馬筮乾力守九日擊退之餘衆由李官橋沿河遁入楚荆子關向無城

僅署副將德培領弁兵五十駐守賊圍浙川時分股由馬蹬攻陷之荆州將軍多隆阿自商南督軍回勦二十一日夜由陡溝出隊偽扶王陳得才與偽啟王梁成富偽主將馬融和等率黨萬餘列隊迎拒副都統穆圖善總兵趙既發姜玉順王萬年等分軍為四前後環攻逆勢不支紛紛敗潰我軍追至荆子關縱火攻之擊死賊目三名生擒七十二名斃賊三千四五百名焚溺死者無數追殺二

十餘里遂復荆子關餘匪由馬蹬竄入鄧州

豫軍紀畧

平定粵匪紀畧中與名臣事畧忠勇公傳

是月皖匪攻博望驛僧營營總恒齡侍衛卓明阿

等追擊之斃賊三千餘賊由山徑竄鎮平恒齡等

因馬隊不能入山折回東路賊往來內鄉浙川山

中依山阻險入武關擾商南縣賊首姜太林等直

至城下荆州將軍多隆阿適至衆未集乃出奇勝

之斃賊二千餘乃竄逸閏八月初七日回擾黑漆

河初八日竄重陽店丁河店西峽口邊騎至五里

川十二十三兩日攻內鄉城不克乃竄鄧州

豫軍紀畧

十一月皖匪與粵匪合股由新鄧浙川李官橋諸

處環轉遁入鄖陽西竄房竹

豫軍紀畧

同治二年十月皖匪張總愚由南召竄鎮平初五

日犯內鄉縣城總兵張曜追及揮兵縱擊賊敗走

初九日犯浙川廳城同知馬筮乾卻之賊據北鄉之

馬蹬板橋蒿坪姚灣其地西通商維南達鄖襄張

曜恐賊走秦楚遣豫中豫後靖淮三營由北山繞  
赴西坪臨勝楚勝各營并郝永剛所部倍道疾走  
荆子闕自率嵩鎮豫右等營扼舊縣絕其入陝之  
路時張總愚方窺武關而川匪藍二順由漢中興  
安竄商州稜稜東犯巡撫張之萬檄張曜嚴備飭  
道員葛承霖以新募湘勇四營由唐鄧馳往浙川  
助勦張曜抵舊縣後分布各營令李世玉屯蒲塘  
敖天印屯卧龍崗郝永剛屯攬子嶺周登高屯東  
塢保英單體屯花園關張士元羅輔臣屯兩河口  
荆子闕副將裴政屯娘娘洞以勦為防日有斬獲  
賊伏板橋川山中專攻民砦砦皆築山巔水道迂  
遠賊以數百人斷汲道即一砦生困一日間分擾  
數十砦其大股則扼板橋要路與官軍相持於是  
各砦紛紛請兵十五六等日張士元羅輔臣率隊  
往援阻山險不得進郝永剛絙崖而上因解金龍  
砦之圍十八日李世玉敖天印擊賊於毛塘斬首

數十級二十日賊攻攬子嶺郝永剛營搶礮環擊不退張曜率軍由河西鈔賊背賊譁潰斬首百餘級乘勝解馬砦之圍賊墮崖澗死者甚衆二十一日賊繞東山復攻郝永剛營我軍先於山口設伏突出要擊賊驚遁追至上集二十二日賊分股犯廳城同知馬筮乾擊却之賊退踞馬蹬夜攻二郎砦民團擊退二十三日復攻二郎砦又擊走之二十五日賊繞出河西攻駐馬板山兩砦張曜往救擒斬數百賊因壘石斷板橋川山口以拒官軍二十八日羅輔臣由靈官崖進屯橋溝伐木為壘壘半成賊衆突至我軍憑半壘列隊擊退之追殺十餘里郝永剛亦截殺攬子嶺攜糧賊是日藍二順竄至西坪保英及高自秀邀之斃賊百餘賊敗至護水關界嶺距西坪十餘里三十日川匪大股驟至保英等鏖戰數時殺賊三百餘把總沈福全戰歿張曜馳援敗賊於回馬溝張總愚知藍逆已至率

衆分犯郝永剛羅輔臣營我軍盡力截勦賊始行  
退李世玉亦敗賊於毛塘十一月初四日川匪犯  
重陽店營張曜督張士元等奮擊追殺二十餘里  
賊於花園關築木壘死守初五日我軍自回馬溝  
繞出花園關後直擣西坪攻破之賊向荆子關大  
路狂奔花園關賊亦棄巢走至小陡嶺敖天印先  
已據其險要矢石交下追兵自後擊之殪賊數百  
斃黃衣騎川馬賊三棄資械無算狂奔百餘里竄  
據青山口地屬商南距荆子關八十餘里張曜令  
敖天印高自秀扼關前防回竄初九日張總愚分  
股犯攬子嶺鎖河口毛塘卧龍崗郝永剛羅輔臣  
李世玉周登高分路却之各軍滾營而進十八日  
羅輔臣搶紮下鎖河口乘月築壘一夕而成與板  
橋川隔一河十九日賊見營壘糾衆出攻羅輔臣  
率隊截殺斃悍賊數十是夜孫之友會同馬筮乾  
襲破鎖河北雞山根賊營進踏河西賊壘斬首數

百級張灣賊衆皆不戰而遁張曜聞之夜令各營  
嚴備自督親軍由上鎖河循岸東行遙聞賊騎蹠  
踏聲揮軍截之賊棄輜重狂走擒斬二百餘獲賊  
謀言總愚欲往魯山嵩縣四棵樹暫屯再由潼關  
西竄張曜遂令蔣希夷周登高自馬山口搶屯四  
棵樹令湯聘珍率馬步追擊賊於二十一日攻內  
鄉縣知縣朱琨擊走之二十二日賊竄馬山口

軍紀畧

豫

三年三月初一日粵匪攻內鄉知縣朱琨參將周  
兆常以噴火筒火箭攻破之賊駭奔由下瓦亭入  
陝西商南境之龍駒砦竹林關穆家埡時又有鍾  
得終股犯荆子關為總兵李殿元參將裴政黃貴  
誠等設伏擊敗由屈元岡至內鄉旋復有分股由  
淇河莊猴兒山突入荆子關縣丞張鴻緒率勇抵  
禦李殿元裴政回兵擊之賊乃遁

豫軍紀畧

二十三日偽啟王梁成富由鄧州元店南竄二十

四日僧師營總春壽擊之軒西里殺賊百餘二十  
七日總兵張曜宋慶副都統善慶色爾固善等追  
及浙川泉山斬悍賊二百餘擒偽朝將林喜桂偽  
澍天安徐隆明梁正坤等并長髮賊百餘奔北山  
者一股我軍追戮殆盡越日五鼓梁成富自率醜  
類沿山冲突我軍分勦逾一時善慶及游擊蔣希  
夷率衆奮擊賊始由板橋南蠻子營翻山遁我軍  
逐北間偵知偽朝將邱陳李三賊糾領馬步七八  
千由西北至張曜會同色爾固善善慶等部勒各  
隊於板橋川老鶴河東岸狙伏伺之賊至我軍突  
起騎兵抄擊斃賊無算生擒邱陳二賊日二十九  
日追及浙川境之娘娘洞我軍乘夜渡河與宋慶  
軍合復鏖戰中槍及溺水死者甚衆四月初一日  
張曜等浮渡丹江由滔河直越楚境追賊入鄖陽

豫軍紀畧中興名臣  
事畧張勤果公傳

八月皖匪張總愚由馬山口循山西竄張曜宋慶

等三路追擊連破之賊紛竄南陽之清華鎮鄧州  
之先主山鎮平之侯家集邊騎至鄧浙交界之李  
官橋復趨南陽攻破周營畢營宋砦

豫軍紀畧

十月張總愚竄鄧州踞構林關十一月十一日宋  
慶等環攻之賊棄砦西遁竄至文曲集我軍遂克  
構林關二十二日賊竄浙川攻李官橋砦為團勇  
擊退折竄鄧州之厚坡據卧牛山廳境於是始無  
賊縱矣迨後五年春皖匪賴任股由楚竄豫擬自

鄧浙西趨出荆子關循商維入秦與張逆股合疊  
為諸軍所挫始折而東六年李文忠運防議興宋  
慶張曜皆調赴東省會勦於是湖北巡撫曾國荃  
檄提督姜玉順以所部扼紮荆子關防西賊張總  
愚回竄從巡撫李鶴年之請也賊乃取道晉省以  
窺豫疆紛擾濟源河內溫孟等處云

豫軍紀畧



